

凡事之踰於分者皆謂之僭 聖上雖在君位而其所為禱者啓運宮則安得
不謂之僭乎惜乎大臣之啓不于其始而于其後也○已卯朔牌廳以外方成
用過限不來請推考全羅監司閔聖徽慶尚監司元鐸咸鏡監司南以恭 從
之○義州府尹李莞馳 啓曰近日越邊別無警急毛營探卒幾至千餘名或
一日程二三日程往來不絕凍餒假獐或二三十名或五六十名日日出來聚
類作賊於我民輒入空家至於殺越人命臣雖多定勁卒巡哨譏察亦無摘發
之路殊為可慮云○命綾原君備入侍啓運宮○庚辰先是安州牧使李時英
聞毛差齊正國有亂言鉤問仍押送于監司尹暄暄令譯官秦智男窮問事狀
正國抵死固諱尹暄枚舉啓聞備局以李時英所為殊甚輕妄請推考且宜申
飭諸將切勿輕動 上曰依啓李時英處事輕妄先失在我之道殊極非矣先
罷後推俾無彼此疑阻之心其後都督因此多有責言於我○夜東方有氣如
火光○辛巳大司憲鄭經世啓曰頃日有人持狀訟冤于本府大要以為往在
光海時奴婢若干口投托于朴承宗家反正初即為還現厥後又舉族逃亡投
屬於延城君家不勝憤惋呈上言啓下其時判決事細閱文券具由入啓自
上燭其冤狀特命還給本主乃是判下御決之訟今者掌隸院受延城君之囑